

Na osnovu člana 16. stav 1. Zakona o Vladi Zeničko-dobojskog kantona - Prečišćeni tekst ("Službene novine Zeničko-dobojskog kantona", broj: 7/10) i člana 23. Zakona o dopunskim pravima branilaca i članova njihovih porodica („Službene novine Zeničko-dobojskog kantona“, broj: 1/14), na prijedlog Ministarstva za boračka pitanja, Vlada Zeničko-dobojskog kantona, na 129. sjednici, održanoj dana 18.01.2018.godine, d o n o s i

U R E D B U

O IZMJENAMA I DOPUNI UREDBE O STIPENDIRANJU REDOVNOG STUDIJA BRANILACA I ČLANOVA NJIHOVIH PORODICA

Član 1.

(Izmjena člana 8. - Uvjeti)

U članu 8. stav (1) Uredbe o stipendiranju redovnog studija branilaca i članova njihovih porodica („Službene novine Zeničko-dobojskog kantona“, broj: 4/14), (u daljnjem tekstu: Uredba), u tački c) riječi „pravno ili fizičko lice“ zamjenjuju se riječima: „privredno društvo“.

Član 2.

(Dopuna i izmjena člana 14. – Obavezna dokumentacija)

- (1) U članu 14. Uredbe, iza tačke g) dodaju se nove tačke h) i i) koje glase:
 - „h) ovjerenu kopiju Specifikacije za utvrđivanje dohotka od samostalne djelatnosti - obrazac SPR 1053 (koji se podnosi uz Godišnju poreznu prijavu/Godišnju prijavu dohotka) za prethodnu kalendarsku godinu;
 - i) ovjerenu izjavu o ukupnim prihodima domaćinstva;“.
- (2) Dosadašnja tačka h) postaje tačka j).

Član 3.

(Stupanje na snagu i objavljivanje Uredbe)

Uredba stupa na snagu danom donošenja, a ista će biti objavljena u „Službenim novinama Zeničko-dobojskog kantona“.

PREMIJER

Broj: 02-02-987/18

Datum, 18.01.2018. godine

Z e n i c a

Miralem Galijašević

DOSTAVLJENO:

1x Ministarstvo za boračka pitanja,

1x „Službene novine Zeničko-dobojskog kantona“,

1x a/a.

O B R A Z L O Ž E N J E

I. Zakonski osnov za donošenje Uredbe

Zakonski osnov za donošenje Uredbe o izmjenama i dopuni Uredbe o stipendiranju redovnog studija branilaca i članova njihovih porodica, sadržan je u članu 16. stav 1. Zakona o Vladi Zeničko-dobojskog kantona, te članu 23. Zakona o dopunskim pravima branilaca i članova njihovih porodica.

II. Razlozi za donošenje Uredbe i obrazloženje pojedinih rješenja

Uredba o stipendiranju redovnog studija branilaca i članova njihovih porodica donesena je na osnovu člana 23. Zakona o dopunskim pravima branilaca i članova njihovih porodica ("Službene novine ZDK" broj 1/14). Uredbu je donijela Vlada Zeničko-dobojskog kantona a objavljena je u "Službenim novinama ZDK" broj 4/14.

Intencija odredbe člana 8. tačka c) Uredbe je bila omogućiti apliciranje za dodjelu stipendija studentima skromnijeg imovinskog stanja. U cilju zapošljavanja branilaca i članova njihovih porodica koji su na evidenciji Službe za zapošljavanje Kantona, Ministarstvo za boračka pitanja planira, izdvaja i dodjeljuje posebna novčana sredstva u skladu sa Uredbom o dodjeli kredita za zapošljavanje branilaca i članova njihovih porodica, te već treću godinu zaredom - na osnovu Programa podsticaja samozapošljavanja pripadnika branilačke populacije Zeničko-dobojskog kantona, kojeg na prijedlog Ministarstva donosi Vlada Kantona po usvajanju Programa utroška sredstava Ministarstva za tekuću budžetsku godinu. Po osnovu dodijeljenih sredstava u ovu svrhu izvršeno je zapošljavanje odnosno skidanje s evidencije nezaposlenih lica većeg broja branilaca i članova njihovih porodica, i time omogućena pomoć u rješavanju egzistencijalnih pitanja njihovih porodica.

Imajući u vidu da odredbe člana 8. sadašnjeg teksta Uredbe praktički onemogućavaju djeci korisnika ovog prava da ostvare pravo na stipendiju (pri čemu je iznos dodijeljenih sredstava za samozapošljavanje često u rang u iznosa stipendije koju bi student ostvario za 4 godine studija), Ministarstvo je u obavljenoj konsultaciji sa kantonalnim branilačkim udruženjima odnosno po pribavljanju njihovog pozitivnog stava u tom smislu, odlučilo predložiti izmjenu Uredbe kojima bi se omogućilo ostvarivanje prava na dodjelu stipendija i djeci iz ovih porodica.

Član 1. Uredbe predviđa izmjenu člana 8. osnovne Uredbe tako što se ograničenje za apliciranje za dodjelu stipendije ubuduće odnosi samo na vlasništvo/suvlasništvo registrovanog privrednog društva. Član 2. predviđa izmjenu i dopunu člana 14. osnovne Uredbe jer se pored dosadašnje dokumentacije od kandidata za dodjelu stipendije zahtijeva i dostava obrasca SPR 1053 koji se podnosi Poreznoj upravi uz obrasce 1051 i/ili 1052. Također se zahtijeva i ovjerena izjava o ukupnim prihodima domaćinstva, a koji često znatno premašuju podatke o plaći i drugim prihodima traženim dosadašnjom dokumentacijom. Intencija ovog člana je uvid u realno imovinsko stanje kandidata a u cilju dodjele stipendije kandidatima sa većim stepenom potrebe u tom smislu.

Sa tekstom Uredbe upoznata su kantonalna branilačka udruženja, koja su na zajedničkom sastanku u kabinetu ministra Ministarstva održanom 28.12.2017.g. jednoglasno podržala predložene izmjene.

Izrada teksta Uredbe je izvršena u skladu sa Jedinstvenim pravilima za izradu pravnih propisa u Zeničko-dobojskom kantonu ("Sl.novine ZDK" broj 5/08). Na tekst Uredbe zatraženo je mišljenje Sekretarijata za zakonodavstvo, Ministarstva finansija i Ministarstva za pravosuđe i upravu, koji u svojim odgovorima nisu istakli primjedbe na isti.

III. Finansijska sredstva potrebna za provedbu Uredbe

Finansijska sredstva za provedbu ove Uredbe osiguravaju se svake godine u Budžetu Kantona na budžetskoj stavci Ministarstva za boračka pitanja, razdjel 24, budžetska organizacija 01, potrošačka jedinica 0001, ekonomski kod 614200, subanalitika OAD 202 "Stipendiranje studenata - branilaca i članova njihovih porodica". Za provođenje ove Uredbe nije potrebno osiguravanje dodatnih budžetskih sredstava s obzirom da se stipendije dodjeljuju kandidatima sa najvećim brojem bodova na listi izrađenoj u skladu sa kriterijima utvrđenim Uredbom, i to do visine opredijeljenih budžetskih sredstava u ovu svrhu.

MINISTAR
Fahrudin Čolaković